

E berdad di All Inclusive

ORANJESTAD - Pa cuminsa e tipo di pakete barata aki ta wordo paga den exterior y gobierno no tin un control debido di e entrada real cu esaki ta produci pa e negoshi aki. A.I. ta por ta bon pa islanan cu ta hopi insegur y peligroso pa asina por tene e hendenan pa den y evita cu nan por sali di nan hotel y ser atraca y horta etc.

Nos isla te ainda ta basta sigur aunke de bes en cuando aki aya algo por sosode pero no na gran escala manera ta e caso na e otro islanan den Caribe y siguramente no mester wordo bendi mescos cu nan ya cu nos tin un producto hopi sigur y semper nos a bende nos isla como un destinacion hopi sigur.

Lo cu semper a bende Aruba ta e sentido di seguridad cu nos ta ofrece na unda un turista por move trankilamente tanto den dia como anochi y por bishita diferente restaurant di e tanto opcion y specialidad nan di restaurant cu nos ta ofrece incluyendo e restaurantnan cu ta keda den hotelnan tambe y esaki ta haci nos un isla hopi special y diferente cu e demas islanan den Caribe.

Convertiendo asina hopi hotel aki na nos isla den un A.I. por crea e impresion cu nos no ta diferente cu e demas islanan aki y cu nos tambe ta hopi insegur locual no ta e caso naturalmente. Especialmente esunnan cu ta bishita nos pa di prome biaha y cu no conoce e isla ta esunnan cu mas por kere esaki eroneamente. A.I. ta un pakete cu ta inclui transporte di y pa ho-



tel cu normalmente ta wordo haci pa un compania di transporte grandi cu ta come tur e bolo aki y e taxistanan ta perde hopi oportunidad di gana nan pan na un hotel asina y esaki tambe por a ser observa caba na momento cu un hotel normal a converti den A.I. y masha hopi taxi ta move di e hotel aki y ta bay stand na otro hotelnan cu no ta A.I. pues esaki ta evidente y ta un echo.

Service Charge

E manera cu ta parti e "trunk" es decir e service charge cu ta wordo cobra na e huespednan tanto na barnan y restaurantnan di e hotelnan A.I. aki tambe ta ilogico y inhusto. Den un hotel normal e trunk aki ta wordo parti den e per-

sonal di F & B manera cu ta coresponde ya cu ta di nan esaki ta y ta nan a bende tanto cuminda y bebida. Den e concepto A.I. e mesun trunk aki cu normalmente ta pertenece na esunnan di F & B ta ser reparti tambe den otro departamentonan di e hotel cu no tin nada di haci cu F & B pa di e manera aki e hotel no tin cu saca placa di nan mesun saco y paga e empleadonan di e otro departamentonan aki. Kiermen anto cu burico tin di traha pa cabay come. Nada contra pa e empleadonan di otro departamento gosa di un bon salario pero esaki mester sali for di e hotel su ganashi y no e comision di e bartenderan y waiternan cu a traha hopi duro pa cu esaki. Por mira esey tambe di e siguien-

te manera p.e. un personal di benta, a bende un auto y na luga di ricibi su comision completo e gerencia ta reparti esaki den e compania di bende auto aki cu no tin arte ni parti den benta. Ta con sindicalistanan por a permiti esaki? incomprendibel.

Mal informacion ariba tip

E huespednan ta ser bisa (mal informa) cu tip (ta inclui den nan pakete) loke ta absurdo y ta un mentira fragante ya cu tip no ta obligatorio si no ta algo di propio discrecion locual kiermen cu si e huesped kier e ta laga un tip si of no, ta su decision basa ariba e servicio. Si ta informa cu tip ta inclui kiermen anto cu e ta "obligatorio"? claro

cu no, tip no ta obligatorio pero sin embargo e mal informacion aki ta wordo duna afo pa atrae e turistanan di masha poco recurso cu no kier tende ni di esaki. Awor si ta esaki bo ta mercadaria ta esaki bo ta haya.

Ta hopi placa ta inverti den turismo y ta nos tur mester por gosa di esaki y no cierto doño di hotelnan SO. Ta hopi miyones Gobierno via A.T.A. ta inverti den mercadeo di nos turismo cada aña y no por ta asina cu pueblo ta inverti anto pa turistanan keda den hotel so cu tanto desayuno, lunch y dinner inclui anto nada pa nos localnan cu a soda basta y a inverti den nan restaurantnan y cu tambe tin derecho di por gosa di e inversion cu ta ser haci tur aña cu nan tambe ta parti di dje. Taxistanan tambe ta parti di e pueblo cu a inverti y tambe tin derecho pero cu A.I. ta un compania grandi di transporte so ta gosa di e inversion miyonario aki.

A adverti

E alarma tocante di e desarojo di A.I. aki na nos isla a ser haci varios aña pasa na momento cu ex- Americana a cambia di man y a bira un A.I. y ta na e momento aki mester a actua si tabata tin vision y bin cu un ley pa regula esaki y no awor cu baca a hoga of ta hogando. Como ex empleado di un A.I. resort y cu ta considera mi mes un hende di vision mi a mira e cos aki ta bin I mi a adverti di esaki y su consecucionan pero ningun hende ni instancia a haci caso di e advertencia aki y ta te awe numa cu ta laat porfin a cuminsa lanta for di soño aunke ta hopi laat caba. □